



# QUÆSTIO MEDICA,

QUOD LIBETARIIS DISPUTATIONIBUS,  
manè discutienda, in Scholis Medicorum, die Jovis  
decimâ-quintâ Januarii.

M. CAROLO BOMPART, Doctore  
Medico, Præsidente.

*An, ut aquarum thermalium, sic et sanguinis vigor  
à sulphure?*

## I.

**M**UNDUM, ingens quoddam animal dixere quidam è  
veteribus, propter eam quam habent inter se *μακρὸς &  
μικροῦ* similitudinem. Uterque machina hydrau-  
lopneumatica. Per artus infusa mens totam agitat molem. Terra  
ponderibus suis librata, dum fiat glacies iners, emortua veluti  
jacet, foliis viduantur orni. Caloris adventu natura tota repuera-  
scit. Intus calore perfunditur; hunc solutum in phlegmate sulphur  
perennat. Corpus humanum suâ movet præsentia, quæ infun-  
dendo creatur, sibi soli sufficiens, sibi soli vivens substantia spiri-  
talis: hæc frigidi impatiens hospitii, calore gaudet, ab ipsis vitæ  
incunabulis partibus insito. Flammæ vitali sustentandæ humido  
radicali nullus aptior fomes: Sulphureum quis inficiatur, si vel  
prima artis chymicæ limina salutaverit. Audiat substantia ærea,  
pinguis, & oleosa, apud priscos medicinæ antistites, nihil mora-  
mur? Ludit quippe interdum verbis novorum systematum auceps,  
cui divinus senex jampridem consuluit, ut altum dormiret. A pa-  
rentibus tradux sulphureus liquor discedit perpetuo, triplici san-  
guinis motu, in quo vitalis fundus, jugiter refarciendus: pejoris  
tamen est conditionis deperditi loco suffectus; hinc miseris mor-  
talibus optima quævis dies fugit prima, subitque tristis senectus;  
licet perpauci tempora maturæ longa senectæ visuri, quæ infir-

mos baculo sustinet artus. Cunctis tandem spiritus sulphureo pabulo destitutus, frigida currit per ossa; & duræ rapit mortis inclementia.

I I.

**S**P E C U S varios, innumeros pene ductus, ex quibus constat univ<sup>er</sup>sum corpus, natura suo excavat genio. A summis ad ima fit commeatus humorum; an sit æquum valis & partibus circumducti sanguinis libramen, an iniquum, non parvi interest; in libera namque purpurei laticis motione, sita est potissimum functionum integritas; hanc juvat sulphur, cujus latibulis excitatus spiritus, nec mediocres excitat virtutes, spes jubet esse ratas, mortales trudit in prælia, reddit audaces omnia perpeti. Efficit & sulphur crines dignos Apolline, & eburnea colla, decusque oris, & ruborem in niveo candore mistum. Pars quæque corporis viret modico floridi sanguinis rivo, sub incremento gemit, etenim inopem facit copia, in propriis laribus flamma vitalis suffocatur, haud secus ac lampas affuso ubertim oleo, arescit decremento, adducitque cutem macies, & in aëra succus corporis omnis abit: vox tantum atque ossa supersunt. Notus feritate sal acidus, ni sulphurum amicabile connubio mitefcatur, balsamica sanguinis natura, (absit verbo injuria,) in acorem fit degener morborum iliadem paritura; hinc fiunt mortales, præmatura nimis victima non commiserantis orci.

I I I.

**M**I S E R homo, morbi sanitatisque reciprocas vices experitur, nec tamen malorum in nobis & bonorum æqua decessio est, facile ab optimo statu & quasi sponte labimur, à vitioso ægrè & invitâ velut naturâ resurgimus. Felix homo cui tot suppetunt divum munera. Larga est, ne dicam prodiga naturæ in remediorum procreatione fecunditas, cum plantas in terræ superficie ubique parturit; nusquam tamen magis admiranda, quam ubi medicatas fundendo lymphas, agris & convalescentibus, facile parabilem medicinam propinat. Quot è metallis eorumque seminariis surgunt homini solamina? Totve thesauri, ne sepulti jacerent in terræ penetralibus, lymphæ per eorum venas devolutæ, perque longum telluris spatium transcolatæ, efficaci dantur spiritu, molliores ipsorum particulas lambunt, duriores radunt, variisque mineralium quæ præterfluunt spoliis onustæ, quâ data porta, hominis in præsidium salientes, foras erumpunt.

**M**IRA est aquarum diversarum Regni Galliae omnis generis opulentia, sed stupenda magis tum fluviorum, & aliarum dulcium, & medicarum aquarum in Arverniae Provincia enumeratio. Hæ varia à locis scaturiginum accepere nomina. Prope Claromontum fons prostat lapidescens, ad cuius præsentiam rigent cuncta, velut ad Medusæ saxificos vultus; non longè hinc fons scaturit bituminosus ad viciniam Montis-ferrandi, mirum quantam, unius diei spatio, sulphuris copiam suppeditet. Vicecomitenses vitriolæ factæ nitro & alumine, Vichenensium viribus haud impares, immo validiores, tantâ quondam hominum frequentiam percelebres fuere, quantâ nunc incuriâ negliguntur. Ad illas ut principiis sic viribus accedunt Medulphianæ. Nec minoris notæ sunt Castellodunenses, Jaleyracenses, Sanflorana, Vicecarladenses, Martyroverenses &c. De iis præsertim hic orsus loqui, quas sulphur tantam extollit inter ceteras, quantum solent cupressi inter lenta viburna. Haud infimæ sedent, quæ urbium principem alluunt Claromontenses nuncupatæ: affuso gallarum decocto rubescunt, & in atramenti colorem denigrantur: Martis divites opum, harum particulas attrahens magnes, satis superque comprobatur: bitumen ignis subterranei pabulum esse, fidem faciunt earundem sapor odorve. Largius epotæ colicos immanes cruciatus velut incantamento sedant. Apud hydropotas quartanæ febres exulant, ceteris præfidiorum generibus rebelles. Peritior quovis artifice natura, sapit ultra pharmacopolarum pyxides. Evanescent importunæ vertigines. Suus sibi florens redditur puellis faciei color. Qui flavo prius sordebant, nunc vegeto colore suffunduntur.

Les Eaux de Vic le Conte, de S. Myon, de Chatedion, de Jaleyrac. De S. Floret. De Vic en Carladois. Des Martres au terroir de Curran.

V.

**Q**UA parte sol declivis, Arvernorum plaga aureis montibus obumbratur, nec illud unico sed multiplici titulo nomen obtinent. Tantâ ditantur soli pinguedine, ut vegetantia cujuscunque generis (Fagonias opes,) amplissimâ segete parturiant. Aureas meritò dixeris, quæ ibi scaturiunt, thermales aquas; auream nempe sanitatem firmant labantem, collapsam restitunt. Chymicæ analysi subditæ, subacidum exhibent salem, ferri quidpiam & sulphuris redolentem. Multifariam unda hæc corpus nostrum afficit, hoc juvat copioso potu proluere, immergæ subit, quos laxat cutis porulos, nec non ex alto fervens in morbosos artus prosilit. Haud perpetua est aquæ aurei montis assumendæ tempestivitas:

Les Bains du Mont-d'Or en Auvergne.

hyeme minùs commodus illius usus , cum verò adduxere sitim tempora , maximè salutaris. Particulæ quibus imprægnatur sulphuræ , crassos , frigidos , & viscidos humores attenuant & coquant : crassior bilis quæ sæpius medicamentorum purgantium vires eluserat , unà cum serosâ illuvie per urinas & sudores abducitur , conceptum ardorem prorsus deponunt viscera. Spiritus nervorum plexus liberitùs excurrunt. Pars quæque sui juris facta gloriatur sibi restitutum vitæ jubar. Si friget uterus meritò dixeris adhuc inutile pondus , quam misera sors conjugis ? Vivet illa sine nomine , quia sine sobole , ni citò quærat solatium. Aureis thermalibus aquis , ( ut ultimâ medicinæ anchorâ ) non amplius languet attrita vis fermenti , non torpet & arefcit arvum muliebre , nec amplius defunt his in partibus caloris blanditiæ , cujus inopiâ , nulli fas sponsæ sperare prolis ornamentum. Brevi tibi sponsa jactabit prægnantis uteri pompam , tibi speranda nuptiarum messis & socialis pignus amoris. Herculeas sane dixeris ? vertigines , epilepsia , membrorum torpores , tremoresve , paralyses , arthritis citò citius profligantur. Pituïta è metropoli , aut aliunde in articulos depluere , & diros cruciatus inducere solita , aut furens mitescit , aut tenuior facta aliò diripitur. Quid plura ? Cæci vident , surdi audiunt , muti loquuntur , claudi ambulant. Tam solennes , tamque egregias dotes sulphuribus acceptas referet sincerus naturæ calculator , equidem sanguinis balsamicam indolem restaurando , genuinis vitæ characteribus corpus beant.

*Ergo ut aquarum thermalium , sic & sanguinis vigor  
à sulphure.*

### Domini Doctores disputaturi.

*M. Jacobus Souhait.*

*M. Daniel Tauvry.*

*M. Raymundus Finot.*

*M. Carolus Bompart , Præses.*

*M. Antonius le Clerc.*

*M. Mathæus Thuillier.*

*M. Claudius Dufresne.*

*M. Petrus Jacquemier.*

*M. Carolus Martean.*

Proponebat Parisiis **CLAUDIUS TRICHARD** , Pacicus,  
Ebroïcensis , Baccalaureus Medicus. A. R. S. H. 1699.

---

Apud Franciscum Muguet , Regis & Facultatis Medicinæ  
Typographum..